

Yudas Leta

Yudasimna Iriki Leta

Isipkita Yitkak

Onggityam leta irika riga re Yudaste. Nangga pena ton tilenggyam b'agenayonj Yakobomna yinggan ke re nokip Yakobo re komkesa sosi wingirind ongwati riga na yibnonj. I osiemb nanyinggan re Yesumna yinggan i. I ton onggityam leta yirikonj re ama rika A.D. siksti powa (64) kemag nat.

I Yudas itemb leta yirikonj nokip ton singi awonj nonony omnenam b'anyginena ouyaena riga gatab yepiya re b'agenaento da ton re gar ke utkunda riga im. Si itemb leta iriki re kutjog e rinte re yipa wip iriki yibim Nimogim Petromna Leta kima. I ket Yudas ogenka riga ugoiny da, “Win geja omnikam owinkina waina gar ke utkunda mile uwogam rina re God yipapyam komkesa Tina riga wa akainonj.”

Simesime Yitkak

¹Simesime! Kon re Yesu Kerisomna wiko riga en, dide Yakobomna yinggan Yudasten. I kon itemb leta yiriken re wa pilwa e yena re Abu God ara emokinonj i Ton singi eyeniny i dide Yesu Keriso yir ipka eyeniny. ²Si kear i ngimbla i dide singi wa pilind ukoijog b'usmurena wowen Godim pilke!

B'anyginena Ouyaena Riga wa B'isagika

³Kor rigawar yena re kon singi eyeninyin! Kon pop kupkakupka danda kima singi aukenenond wa pilwa peba irikam yirkokar okata yitkak gatab rinte re men komkesa gar ke utkunda rigap yipand gilgil yokatenenyu. Aji yu kon b'ipinsin da kor kemb iminjog win nokatau wanim peba irikam, nokip ingkaimemb wen tugoinyin da win b'ogla geja b'itiyenindam waina gar ke utkunda uwogam rina re God yipapyam akainonj komkesa yina riga wa. ⁴Mop nokip kea ninda riga yidir kesa b'igarkito wa wingirind. Si ton re Godim ewangaya kesa riga im, i ton

engendenenanj mera Godimna wurar de negir omnika mile wa, i dide ton kea yoeneno mera yipaina nena Ukoyam dide Yonggyam Yesu Kerisond. Si b'ila iriki peba wingirind ija emb ji naska kana yindeniy towa gatab da, ton opima iminjog takatenanj odede wip negir ma b'isagika rina re God aramiteninonj.

⁵I kon wumir en da, win re wumir im onggityam komkesa mile gatab rina re Yonggyam amnikinonj, aji kon singi en wen b'usaya nonony omniam onggit gatab. Si b'ila Yonggyam kea Tina Israel riga apenjinonj Ejipt gou ke, aji daka yimta ke Ton negir amninonj yepiya re maka Tinim gar ke utkunda yoramiteno. ⁶I God aneru wa agoninonj danda towanim ingaenam, aji ninda anerup maka owama eyento onggityam towainajog danda, si ton kea yiraro towainajog wimenapu pipmet. Si God opimemb aneru kea dadal ngirpu kesa sein kai ke ejobikinonj, dide owama eyeniny ukoi sibib borand ngirpu ra Tina ukoi jog b'isagika bibir ik dem. ⁷I Sodom ake Gomora dide ninda wuswus taun rigap, toda kwa kea odede yipa wip nya yimayo rina re aneru wuwonj. Si ton negir b'iyena mile amnikenento, i kwa b'enga wip b'iyena mile yimta yundoko rina re God maka engainonj omniam. Si onggit penaemb God towa negir ma b'isagika akainonj wul ke imbrikam. I ingkenaemb Ton naska kana wingata aramitawonj riga wa da ita Ton ngirpu kesa wul ke negir ma b'isagika omniam dem.

⁸I dide kwa onggit rigap yena re wimat wip amneniny mile omniam, todaka odede yipa wip nya kaim towaina ji engenenanj kilkil mile omniam. I ton Godimna danda ke wip omnena riga esaenenanj. I dide ton b'ogil inyomarena kima God ma omniam wub kumb riga esadrenenanj. ⁹I mopyam aneru, Mikael kea Satana kima yit b'ipatenonda, i ket yit b'ugwatanonda Mosemna ujmig gatab. Si ton pop opulitam yomnonj negir ma b'isagika yit tin isadrena yit kima, aji ton God na moga yuwadonj, i odedep maka yopulitonj. Aji ton yindonj da, "Toko Yonggyam samany meyou." ¹⁰Aji opimemb wima yimta undoka rigap esadrenenanj gasa rinsim re ton maka wumir aukenenanj. I ton re b'angga pila im rinsim re maka b'auyaenenanj wumir okatam. Si ton get ke okati ipindena wumir kaim gasa angwatanenanj. I onggityam towaina ongwati milepim ten negir amnikenenanj. ¹¹Ukoi kear towanim, ridede sake im takatanj! Ton inte nya yundokenenyi rina re Kain negir mile omniam yikenonj. I ton kwa b'ururkenenanj onggityam nya wa rina re Balaam yikenonj negir kaokao nya ke mira wulkip okatam. I dide ton kwa God kima geja b'iyenenanj, i negir aukenenanj odede it re ringmena re Kora Godimna danda okai Mose ake Aron esadrenenanj tina riga kima, i ton ket odede nya kenaemb God kima geja b'iyenenanj. Si ingkenaemb tina riga kima negir aukito. ¹²I ra opimemb riga yipand gilgil diyam taukanj waina singi b'iyena diyamdiyampund, ton isanikesa jabajaba

owou awenenanj. Si ton wa wingirind kil kima riga im aukenenanj. I ton pop riga yir ipkam wip iyoi riga im wekeny, aji ton ma opima riga yir ipka eyenanj, aji ton towalenggyam nena im yir b'ipka wuweny. I towaina ouyaena re piro kesa moi nena pila im rinsim re ribit utureneniny. I kwa towaina mile omnika re odede wip im ringmim re wul nanggip towaina wulkip win yokatenyi aji kip kesa im wekeny, nokip kea uj aukito dide ket nimogim ujim re ap uromki im rogilkak wekeny. ¹³I kwa onggit rigap towaina negir omnika ke ingar kima mile im pitapita amnikenenanj odede opi re ukoi oror wuro re dide ringmim re negir au b'iskenenanj nyi bora ke de sipa yuru wa. I ton re iki pila im rinsim re God ma oramiti nya asungairanj, dide wuweny rokate re God towanim dadal ngirpu kesa ukoi jog sibib ongonjeni awamau.

¹⁴I dide kwa Adamim pilke sebenim (7) b'usmureni b'iga Enok onggit riga wa gatab bage yit yindonj da, "Yir de, Yonggyam iminjog ita ik Tina ogenka kesa jogjog^a yina aneru kima. ¹⁵I Ton ik ra komkesa riga wa pilind b'isagika omnika ma dide kikitum isagika yit omna mim komkesa Godind ewangaya kesa riga wa pilwa. Si Ton opima kikitum isagika yit tamniny dem komkesa towaina omniki Godind ewangaya kesa mile gatab dide komkesa negirjog danda kima yit gatab rina re Godind ewangaya kesa negir mile rigap Tinim apurenento." ¹⁶Si opimemb riga re yit b'ebongnena riga im, i b'inja wa riga im. I ton re towainajog gim ke mile singi nasim wuweneny, dide ton towaina tugim ke b'asourena yit im apurenenanj. I ton kwa riga wa pilwa b'anyginena b'ogil yit apurenenanj i ingkaimemb ket b'umunena mile amnikenenanj b'ogil gasa imdam.

B'ugowa Yit dide B'ingawa Yit

¹⁷Kor rigawar yena re kon singi eyeninyin! Aji win b'ogla nonyind tawamindam onggityam yitkak rina re mera Yonggyam Yesu Kerisomna itmikitijog rigap naska kana apurenento. ¹⁸Si ton ija naemb ji wanim endento da, "Kikitum winind opima wa wingirind yitkar riga pita taukanj dem, i ton towainajog gim ke mile singi nasim tuweneny, i ingkaimemb ton Godind ewangaya kesa mile tamnikenenanj dem." ¹⁹Si onggit rigapimemb ji bu b'iyena mile amnikenenanj wa wingirind. I ton re gim ke negir mile nasim nony menamena amnikenenanj, aji ton re ma Yinayina Wingawinga kima im. ²⁰Kor rigawar yena re kon singi eyeninyin! Aji win b'ogla walenggyam walenggyam yim b'atkaenenindam owinkam waina gar ke utkunda ke rina re Yinayina God akainonj. Dide win b'ogla yir topmitenenindam Yinayina Wingawingamna danda ke. ²¹I win b'ogla wimena tuwenyit Godimna singi b'iyena mile wingirind i ingkaim win walenggyam b'ulongkena

^a 1:14 Grik peband da "jogjog ten tausin (10,000)".

tuwenyit negirim pilke. Dide win b'ogla iminjog nony ijawa kima yir ungaukenenya mera Yonggyam Yesu Kerisomna kear ngirpu win okasya dem dadal ngirpu kesa yirkokar. ²²I win b'ogla kear ten tamnenindam yepim re nonysipsip aukenenanj gar ke okati God ma yit gatab. ²³I ninda riga wuweny re b'isagikapu wul wa im, si win b'ogla onggityam wulim pilke ten tadikenenindam yirkokar okawam. I ninda riga re kil kima im aukenenanj towaina negir mile ke, si win b'ogla ten kear tamnenindam moga kima, aji singi kesa tamnenindam towaina kobirgim rina re ton kea kil kima amnikto towaina negir mile omnika wingirind.

B'ogil Omna Yit

²⁴God re danda e, si Ton ririr e negir mile ke ombombrena kesa wen owamam, dide b'injawa kesa ukoi sam kima wen tawinkiny dem Ti wipind rokate re Tina b'ogil inyomarena yibim. ²⁵God re mera Yonggyam Yesu Keriso na yingawonj yirkokar okawam. Si Ti pilkaimemb b'ogil inyomarena i ukoi jog esourena kima danda i danda i dide juwai mera yipaina God, Ton kima yete re yirkokar okawa Riga ngirpu kesa naskand b'ilap win dide yunim i dide waritawarita dadal ngirpu kesa, iminjog!